

## 5-§. Qo'shib yuborish shaklida qayta tashkil etishni amalga oshirishda moliyaviy hisobot ko'rsatkichlarini shakllantirishning xususiyatlari

28. Qo'shib yuborishda qatnashayotgan korxonalar qo'shib yuborish tartibi va shartlari, har bir korxona aksiyalari (ulushlari)ni yangi korxona aksiyalari (ulushlari)ga konvertasiya qilish tartibi belgilanadigan qo'shib yuborish to'g'risida shartnoma tuzadilar. Qo'shib yuborishda qatnashayotgan har bir korxona qo'shib yuborish shaklida qayta tashkil etish, qo'shib yuborish to'g'risidagi shartnoma va topshirish dalolatnomasini tasdiqlash to'g'risidagi masalalarni aksiyadorlar (ishtirokchilar) umumiy yig'ilishining muhokamasiga kiritadi.

29. Qo'shib yuborish shaklida qayta tashkil etishda o'z faoliyatini to'xtatayotgan barcha qayta tashkil etilayotgan korxonalar vujudga kelgan korxona haqidagi yozuv Reyestrda kiritilishidan oldingi kungacha bo'lgan holatga ko'ra yakuniy moliyaviy hisobot tuzadilar. Bunda yakuniy moliyaviy hisobot tuzilgunga qadar daromadlar va xarajatlar hisobini yuritish schyotini yopish va sof foyda summasini ta'sischilarning qo'shib yuborish shaklida qayta tashkil etish to'g'risidagi qarori (shartnomasi)da belgilangan maqsadlarga yo'naltirish (taqsimlash) amalga oshiriladi.

30. Qo'shib yuborish shaklida qayta tashkil etishda qayta tashkil etilayotgan korxonalarning joriy faoliyati bilan bog'liq barcha operatsiyalar, shuningdek topshirish dalolatnomasi tasdiqlangan sanadan boshlab o'tgan davrda amalga oshirilgan qayta tashkil etish bilan bog'liq

xarajatlar vujudga kelgan korxona haqidagi yozuvni Reyestrğa kiritish sanasiga qadar qo'shib yuborish shaklida qayta tashkil etish munosabati bilan o'z faoliyatini to'xtatayotgan korxonalarning buxgalteriya hisobida va yakuniy moliyaviy hisobotida aks ettiriladi.

31. Qo'shib yuborish shaklida qayta tashkil etish natijasida vujudga kelgan korxonaning davlat ro'yxatidan o'tkazilgan sanaga bo'lgan holatga ko'ra dastlabki moliyaviy hisoboti topshirish dalolatnomasi ma'lumotlari hamda qayta tashkil etilgan korxonalarning buxgalteriya hisobida aks ettirilgan mazkur BHMSning [30-bandida](#) sanab o'tilgan operatsiyalarni hisobga olgan holda tuzilgan yakuniy moliyaviy hisobot miqdoriy ko'rsatkichlarini (mazkur BHMSning [26-bandida](#) keltirilgan miqdoriy ko'rsatkichlar bo'yicha o'zaro hisob-kitoblarni istisno qilganda) satrma-satr birlashtirish (qo'shish yoki o'tgan yillarning qoplanmagan zararlari bo'lgan taqdirda, ayirish) asosida, shuningdek mazkur BHMSning [34](#) va [36-bandlarida](#) nazarda tutilgan holatlardan kelib chiqib tuziladi.

Bunda qo'shib yuborish shaklida qayta tashkil etilayotgan korxonalarning moliyaviy natijalari to'g'risidagi hisobotlar (2-son shakl) miqdoriy ko'rsatkichlarini qo'shish qo'shib yuborish shaklida qayta tashkil etish natijasida vujudga kelgan korxonaning dastlabki moliyaviy hisobotida amalga oshirilmaydi.

32. Vujudga kelgan korxona davlat ro'yxatidan o'tish sanasiga bo'lgan holatga ko'ra dastlabki moliyaviy hisobotni tuzishda qayta tashkil etish jarayonida olingan aktivlar, majburiyatlar va boshqa miqdoriy ko'rsatkichlar haqidagi ma'lumotlarni ular topshirish dalolatnomasida

aks ettiriluvchi baholashda, qo'shib yuborish shaklida qayta tashkil etilayotgan korxonalarning yakuniy moliyaviy hisobotidagi miqdoriy ko'rsatkichlardan kelib chiqib to'ldiradi.

33. Qo'shib yuborish to'g'risidagi shartnomaga va unda nazarda tutilgan ta'sischi'larning qo'shib yuborish shaklida qayta tashkil etilayotgan korxonalarning aksiyalari (ulushlari, paylari)ni vujudga kelgan korxonaning aksiyalari (ulushlari, paylari)ga konvertasiya qilish (ayirboshlash) tartibi to'g'risidagi qaroriga muvofiq, vujudga kelgan korxonaning dastlabki moliyaviy hisobotida qo'shib yuborish shaklida qayta tashkil etilayotgan korxonalarning tarkib toptirilgan ustav kapitali aks ettiriladi.

Agar qo'shib yuborish to'g'risidagi shartnomada vujudga kelgan korxonaning ustav kapitali miqdorini qayta tashkil etilayotgan korxonalarning ustav kapitallari summasidan, shu jumladan qo'shib yuborish shaklida qayta tashkil etishda qatnashayotgan korxonalarning o'z manbalari (qo'shilgan va zaxira kapitali, taqsimlanmagan foydasi va h.k.) hisobiga ko'paytirish nazarda tutilgan bo'lsa, vujudga kelgan korxonaning dastlabki moliyaviy hisobotida qo'shib yuborish to'g'risidagi shartnomada qayd etilgan ustav kapitali miqdori aks ettiriladi.

Agar qo'shib yuborish to'g'risidagi shartnomada vujudga kelgan korxonaning ustav kapitali miqdorini qayta tashkil etilayotgan korxonalarning ustav kapitallari umumiy summasidan kamaytirish nazarda tutilgan bo'lsa, vujudga kelgan korxonaning dastlabki moliyaviy hisobotida qo'shib yuborish to'g'risidagi shartnomada qayd etilgan ustav kapitali miqdori aks ettiriladi, o'rtadagi

farq esa huquqiy vorisning dastlabki buxgalteriya balansida «Xususiy mablagʻlarning manbalari» boʻlimida «Qoʻshilgan kapital» miqdoriy koʻrsatkichi bilan tartibga solinishi lozim.

34. Agar qoʻshib yuborish toʻgʻrisidagi shartnomada nazarda tutilgan ustav kapitalining miqdori vujudga kelgan korxonaning sof aktivlari qiymatiga mos kelgan boʻlmasa, dastlabki buxgalteriya balansi «Xususiy mablagʻlarning manbalari» boʻlimining miqdoriy koʻrsatkichlari quyidagi tartibda shakllantiriladi.

Aksiyalarni konvertasiya qilishda qoʻshib yuborish shaklida qayta tashkil etish natijasida vujudga kelgan korxonaning sof aktivlari qiymati ustav kapitali miqdoridan koʻp boʻlib qolsa, dastlabki buxgalteriya balansi «Xususiy mablagʻlarning manbalari» boʻlimining miqdoriy koʻrsatkichlari sof aktivlar qiymati miqdorida, ustav kapitaliga va qoʻshilgan kapitalga ajratgan holda shakllantiriladi (sof aktivlar qiymatining aksiyalarning jami nominal qiymatidan oshishi).

Agar (aksiyalarni konvertasiya qilish hollarini istisno qilganda) vujudga kelgan korxonaning sof aktivlari qiymati ustav kapitali miqdoridan koʻp boʻlib qolsa, oʻrtadagi farq dastlabki buxgalteriya balansi «Majburiyatlar» boʻlimida «Uzoq muddatga uzaytirilgan daromadlar» va «Muddati uzaytirilgan daromadlar» miqdoriy koʻrsatkichlari bilan manfiy gudvill tarzida tartibga solinishi lozim.

Agar qoʻshib yuborish shaklida qayta tashkil etish natijasida vujudga kelgan korxonaning sof aktivlari qiymati ustav kapitali miqdoridan kam boʻlib qolsa, oʻrtadagi farq dastlabki buxgalteriya balansi «Uzoq

muddatli aktivlar» bo'limida «Nomoddiy aktivlar» miqdoriy ko'rsatkichi bilan gudvill tarzida tartibga solinishi lozim.